

Montes aperti, nudi, non admodum prærupti, ad regionem collinam, cui regio campestris elatior haud absimilis, pertinent.

*Vegetatio rupestris*, in eo memorabilis est, quod plantæ australioris latitudinis, singulari quadam locorum natura, vel intensiore colore, in rupibus, meridiem versus pronis, sæpe vegetare animadvertuntur; quamquam in subjacentibus campis minime provenire possint. Quare hæc singularis rupium vegetatio, in geographica plantarum distributione, non est ad vegetationem totius regionis æstimanda.

#### §. 44.

Vegetationis collinæ differentia in eo deprehenditur, quod plantæ propter tempestates nimiamve siccitatem, abbreviatæ, strictæ atque solidæ factæ, plus in genere fructui conferre, quam foliis tribuere videantur. Siccitate enim contrahuntur vasa, et tota minuitur planta. Folia alias plana, convoluta, eamque ob causam angustata, vel alio modo contracta evadunt. Materia mucilaginosa et glutinosa, aqua sua orbata, pubescentiam edit. Hinc vegetatio collina formandæ pubescentiæ aptissima, cujus rei exempla supra allata sunt.